

摘藻堂四庫全書薈要

史部

欽定四庫全書薈要卷六千八百八十五

吏部

明史卷二百九十二

大學士張廷玉等奉 敕修

列傳第一百八十

忠義四

張允登

郭景高
郭應響

張光奎

楊于楷等

李中正

馬足輕等

方國儒

王紹正
常存
畏
劉定國

何承光

高日臨等

龐瑜

董三謨等

尹夢鼇

趙士寬等

盧

謙

張有俊等

龔元祥

子炳衡
姚九恭

王信

史記言

李君賜等

梁志仁

單思仁等

王國訓

胡爾純等

黎弘業

馬如蛟等

張紹登

張國勛等

王

燾

魏時光

蔣佳徵

吳暢春等

徐尚卿

王時化等

阮之鈿

郝景春

子鳴璽等

張克儉

鄭日廣等

徐世淳

子肇梁
余塙等

張允登漢州人萬曆三十八年進士歷知寧陽咸陽有
善政其成進士出湯賓尹之門賓尹弗善也而東林以
賓尹故惡之舉卓異得刑部主事累遷河西兵備副使
廊延歲飢亟遭盜允登拊循備至士民德之崇禎四年
閏十一月督餉至甘泉降卒潛與流賊通殺知縣郭永
固劫餉允登力禦不敵死廊人素服迎其喪哭聲震十
里罷市三日當是時流賊日熾總督洪承疇往來奔擊
日不暇給逾月陷宜君又陷葭州僉事郭景嵩死之明

年二月陷鄜州兵備副使郭應響死之應響福清人萬
厯丙午舉鄉試第一寧塞餘賊來犯應響禦之斬賊常
山虎等十五人至是混天猴率衆夜突至應響登北關
集士卒拒守手殺三賊力不支遂死事聞贈光祿寺少
卿謚忠烈予祭葬廕一子入監讀書

張光奎澤州人仕至山東右叅政崇禎五年流賊躡山
西監司王肇生以便宜署歙人吳開先為將使擊賊戰
澤州城西賊敗去從沁水轉掠陽城開先恃勇渡沁戰

北留墩下擊斬數百人礮盡無援一軍盡沒賊乃再犯
澤州光奎方里居與兄守備光璽千總劉自安等率衆
固守八日援兵不至城陷並死之澤大州也遠近為震
動事聞贈光祿卿光璽等贈恤有差是歲紫金梁等寇
遼州里居行人楊于楷與主事張友程佐知州信陽李
呈章拒守力屈城陷於楷被執罵賊死程章友程及舉
人趙一亨侯標並死之明年六月賊陷和順里居昌平
副使樂濟衆被傷不屈投井死贈于楷光祿少卿濟衆

太僕少卿有徐明揚者浮梁人由選貢生為平順知縣
六年四月賊來犯設策守禦城破不屈死

李中正盧氏人萬厯末舉會試以天啟二年赴廷對授
承天府推官遷兵部主事崇禎初謝病歸六年羣盜大
亂河北其冬乘冰渡河遂由澠池犯盧氏中州承平久
不設備驟聞賊至吏民皇駭知縣金會嘉棄城遁十二
月賊入城中正勒家衆及里中壯士奮擊衆寡不敌力
戰死賊縱掠城中執舉人靳謙書使跪不屈大罵而死

賊以是冬始入河南自是屢陷名城殺將吏無算鄉官
舉貢多被難其宜陽馬足輕靈寶許煇新安劉君培馬
山李登英偃師裴君合陝州張我正張我德孟澤孫挺
生高縣傳世濟李佩玉上蔡劉時寵輩則先後以布衣
抗節顯足輕性孝友弟惑婦言迫分產乃取田硯薄者
自予萬厯末歲大凶出粟六百石以振焚券千餘崇禎
六年冬流賊渡河而南挈家避之石龍崖三女皆殊色
慮賊汚悉投崖死足輕被執厲聲大罵賊怒并三子殺

之家衆皆遇害惟存次子駿一人後登鄉薦輝為縣陰陽官為賊所掠大罵見殺君培有義行攜子及從孫避難道遇賊欲殺其從孫君培曰我尚有男此子乃遺孤幸舍之而殺我賊如其言二子獲免山性剛直土寇于大中陷新安獲山使負米叱曰我天朝百姓肯為賊負米耶大罵而死登英亦以罵賊死君合幼孤母苦節孝養惟謹賊至聚衆保沙岸寨攻圍十晝夜不克說之降大罵不從寨破被磔我正素豪俠集衆保鄉里一方賴

之十四年勒衆禦賊賊三人俄賊大至衆悉奔奮臂獨

戰賊愛其勇欲生致之詬罵自刎死我德知賊至恐妻

子受辱驅一家二十七人登樓自焚挺生精星術預卜

十五年有寇禍編茅河渚以居賊蹤跡得之語其妻梁

氏曰此匹夫狗義之秋也夫婦對泣詬賊而死世濟與

兄世舟並為土匪于大中所執將殺之兄弟相抱泣賊

議釋其一世濟即奪賊刀自殺世舟獲免佩王者御史

興元孫也崇禎末中州盡殘佩玉結遺民捍鄉井與鄰

寨相倚角往往尾賊後奪其輜重賊憚之不敢出其境
後大舉圍別寨佩玉往救力戰而死里人聚哭之時寵
有孝行賊陷城其父宗祀以年老不能行命之速避遂
自殺時寵慟哭刺殺一子三女夫婦並自剄其妹適歸
寧亦從死一家死者八人

方國儒字道醇歙縣人四歲失父奉母以孝聞天啟元
年舉於鄉崇禎間授保康知縣流賊大入湖廣將吏率
望風先奔保康小邑素無兵七年正月賊至國儒急率

鄉兵出禦力不支城遂陷亡何賊退國儒還入城踰月復至督吏民固拒賊至益衆復陷國儒官服坐堂上被執大罵身中七刃死賊陷竹溪訓導王紹正死之穀城舉人常存畏會試赴京道遇賊欲劫為首領罵不絕口死他賊犯興山知縣劉定國堅守城將陷遣吏懷印送上官罵賊死

何承光貴州鎮遠人萬歷四十年舉於鄉崇禎中歷夔州同知七年二月賊由荊州入夔門犯夔州副使周士

登在涪州城上倉猝無備通判推官知縣悉遁承光攝
府事率吏民固守力竭城陷承光整冠帶危坐賊入殺
之投屍於江事聞贈承光夔州知府自賊起陝西轉寇
山西畿輔河南北及湖廣四川陷州縣以數十計未有
破大郡者至是天下為震動其他部自漢中犯大寧知
縣高日臨見勢弱不能守齧指書牒乞援上官率眾禦
之北門兵敗被執大罵不屈賊碎其體焚之訓導高錫
及妻女巡檢陳國俊及妻皆遇害日臨字儼若鄱陽恩

貢生賊陷夔州他賊即以次日陷巫山通江巡檢郭纘
化陣沒通江指揮王永年力戰死至四月守備郭震辰
指揮田實擊賊百丈關兵敗被執罵賊死

龐瑜字堅白公安人家貧躬耕自給夏轉水灌田執書
從牛後朗誦不輟由歲貢生授京山訓導崇禎七年擢
陝西崇信知縣縣無城兵荒貧民止百餘戶瑜知賊必
至言於監司陸夢龍以無兵辭瑜集士民築土垣以守
流涕誓死職閏八月天大雨土垣盡圯賊掩至瑜急解

印遣家人齎送上官端坐堂上以待賊至猝令跪瑜罵
曰賊奴敢辱官長拔刀脅之罵益厲賊掠城中無所有
執至野外剖心裂屍而去贈固原知州時賊盡趨秦中
長吏多殉城者山陽陷知縣董三謨黎平舉人也及父
嗣成弟三元俱死之妻李氏亦携子女偕死贈光祿丞
立祠與嗣成三元並祀妻女建坊旌表吉永祚輝縣人
為鳳縣主簿謝事將歸會賊至知縣棄城遁永祚倡義
拒守城陷北面再拜曰臣雖小吏嘗食祿於朝不敢以

謝事逃責大罵死之子士樞士模皆死教諭李之蔚鄉
官魏炳亦不屈死永祚贈漢中衛經歷餘贈卹有差婁
琇知涇州閏八月城陷死贈太僕少卿蒲來舉和甘泉
賊來犯守備孫士法等擁兵不救城破來舉手刃一賊
傷六賊而後死贈光祿少卿呂鳴世福建人由恩貢生
為麟遊知縣兵燹後拊居民有恩城陷賊不忍加害自
絕食六日卒有宋緒湯者耀州諸生被獲大罵死

尹夢鼈雲南太和人萬厯時舉於鄉崇禎中知潁州八

年正月方謁上官於鳳陽聞流賊大至立馳還賊已抵城下乃偕通判趙士寬率民固守城北有高樓瞰城中諸生劉廷傳請先據之夢龍以為然而廷傳所統皆市人不可用賊遂據樓以攻且鑿城頽數丈城上人皆走止之不可夢龍持大刀獨當城壞處殺賊十餘人身被數刀賊衆畢登遂投城下烏龍潭死弟姪七人皆死之廷傳者故布政使九光從子任俠好義亦罵賊死九光子廷石分守西城中賊刃未絕口授友人方畧令繕牘

上當事旋卒士寬字汝良掖縣人由門廕為鳳陽通判

駐潁州以正旦詣郡城聞警一日夜馳三百里返州城

陷率家衆巷戰力竭亦投烏龍潭死妻李携三女登樓

自焚僕王丹亦罵賊死鄉官尚書張鶴鳴弟副使鶴騰

子大同中書舍人田之潁知縣劉道遠光祿署正李生

白訓導丁嘉遇舉人郭三杰諸生韓光祖等皆死之光

祖進士獻策父也被執賊捽使跪叱曰吾生平讀書止

知忠義遂大罵賊殺之碎其屍妻武偕一妹一女並獻

策妻李赴井死妻李方有娠賊剖腹剔胎死次子定策
孫日曦罵賊死獨獻策獲存時被難者共一百三人城
中婦人死節者三十七人烈女八人潁州忠烈稱獨盛
云潁州衛隸河南流賊至指揮李從師王廷俊千戶孫
升田三震百戶羅元慶田得民王之麟俱乘城戰死賊
既陷潁州屠其民其別部即以是月由壽州犯鳳陽鳳
陽故無城中都留守朱國相率指揮袁瑞徵呂承蔭郭
希聖張鵬翼周時望李郁岳光祚千戶陳弘祖陳其忠

金龍化等以兵三千送賊上塞山多斬獲俄賊數萬至
矢集如蝟遂敗國相自刎死餘皆陣沒賊遂犯皇陵太
肆焚掠知府顏容暄囚服匿於獄釋囚獲之容暄大罵
賊杖殺之血浸石堦宛如其像滌之不滅士民乃取石
立塚建祠奉祀推官萬文英卧病賊索之子元亨年十
六泣語父曰兒不得復事親矣出門呼曰若索官何為
我即官也賊繫之顧見其師萬師尹亦被繫紿賊曰若
欲得者官爾何繫此賤隸賊遂釋之元亨乃極口大罵

賊怒斷脛死文英獲免容暄漳浦人文英南昌人皆進士一時同死者千戶陳永齡百戶盛可學等四十一人諸生六十六人舉人蔣思宸聞變投繯死後給事中林正亨錄上其狀贈夢鼈光祿少卿士寬光祿丞餘贈卹有差

盧謙字吉甫廬江人萬曆三十三年進士授永豐知縣擢御史出為江西右叅政引疾歸崇禎八年二月流賊犯廬江士民具財帛求免賊偽許之俄襲陷其城謙服

命服危坐中門賊至欲屈之罵曰吾朝廷憲臣肯為賊

屈耶鼠輩滅亡在即安敢無禮賊怒殺之投屍於池

水盡赤舉人張受畢尹周亦不屈被殺是年正月賊陷

霍邱縣丞張有俊教諭倪可大訓導何炳鄉官田既庭

戴廷對舉人王毓貞死焉賊陷巢縣知縣嚴覺被執不

屈一門皆死二月犯太胡知縣金應元據城東大濠以

守奸人導賊渡濠執應元斫之未殊自經死訓導扈永

寧亦死之謙贈光祿卿餘贈卹如制覺歸安人應元浙

江山陰人皆舉人

龔元祥字子禎長洲人舉於鄉崇禎四年為霍山教諭
屬廬隅以名教自任與訓導姚允恭友善八年賊陷鳳
陽元祥偕縣令守禦賊奄至今逸去元祥督士民固守
或勸之避元祥曰食祿而避難不忠臨危而棄城不義
吾平日講說者謂何倘不測死爾及賊陷城元祥整衣
冠危坐賊至侃侃諭以大義賊欲屈之厲聲曰死即死
賊輩何敢辱我賊怒執之去罵不絕口遂遇害子炳衡

號呼罵賊賊又殺之閱五日允恭斂其屍即自縊適令至解免越日賊復入允恭卒死之事聞贈元祥國子助教建祠曰忠孝以其子配之恭亦被旌

王信陝西寧州人父歿廬墓三年母歿信年已六十足不踰閭者三年崇禎初由歲貢生除靈璧訓導遷真陽知縣八年二月出撫土寇會流賊猝至被執使諭降羅山真陽信大罵不從斷頭剖腹而死閱四日其子來覓猶舒指握子手贈光祿丞建祠奉祀

史記言字司直當塗人崇禎中舉人由長沙知縣遷知
陝州陝當賊衝記言出私財募士聘少室僧訓練之八
年冬十一月流賊犯陝記言禦之斬數十級生禽二十
餘人老獍憤率數萬人攻城不克乘雪夜來襲而所
練士方調他郡城遂陷記言縱火自焚兩僧掖之出曰
死此何以自明乃越女牆下賊追獲之令降叱曰有死
知州無降知州也遂被殺指揮李君賜殺數賊而死訓
導王誠心里居教諭張敏行姚良弼指揮楊道泰阮我

疆鎮撫陳三元亦不屈死是年十月賊陷盧氏知縣白楹自剄十年九月陷澠池知縣李邁林死之記言贈光祿少卿餘贈卹有差

梁志仁南京人保定侯銘之裔也萬厯末年舉於鄉崇禎六年授衡陽知縣調羅田賊大擾湖廣志仁日夕儆備羅汝才謂左右曰羅田城小易克然梁君長者吾不忍加兵俟其去當取之會邑豪江猶龍與賊通志仁捕下獄猶龍知必死潛導汝材別枝來攻八年二月猝攻

城志仁急偕典史單思仁教諭吳鳳來訓導盧大受督
民守禦城陷志仁持長矛巷戰殺六賊力屈被繫抑使
跪罵曰我天子命官肯屈膝賊輩耶賊怒碎其支體焚
之妻唐被逼大罵奪賊刀不得口齧賊手遂遇害思仁
等亦不屈死汝才在英山聞之馳至羅田斬其別校曰
奈何擅害長者以錦繡斂其夫婦屍鳳來福建舉人大
受寶慶貢生詔贈仁志蘄州知州思仁羅田主簿鳳來
國子助教大受學錄廕子祭奠有差

王國訓字振之解州人天啟二年進士歷知金鄉壽張
滋陽武清坐大計久之調補扶風國訓性剛嚴耻干進
故官久不遷崇禎八年秋賊來犯偕主簿夏建忠典史
陳紹南教諭張弘綱訓導陳繻嬰城固守閱兩月外援
不至城陷罵賊死建忠等亦不屈死贈國訓光祿少卿
建忠等皆贈卹當是時大師曹文詔艾萬年等並戰歿
賊勢益張關中諸州縣悉殘破八月賊陷永壽殺知縣
薄匡宇尋陷咸陽殺知縣趙躋昌其時長吏以死聞者

隴州知州胡爾純自經死延長知縣萬代芳與教諭譚
恩驛丞羅文魁協力守城城陷皆死之代芳妻劉妾梁
從死爾純山東人贈光祿少卿代芳贈光祿丞妻妾建
坊旌表恩等亦賜祭有孫仲嗣者膚施人由貢生為階
州學正當事知其才委以城守賊大至盡瘁死守城破
與妻子十餘人並死之贈國子博士又有楊呈秀華陰
人由進士歷官順慶知府大計罷歸賊攻城佐有司禦
賊以死贈卹如制

黎弘業字孟擴順德人由舉人知和州宗禎八年流賊
犯和州禦却之十二月復至與鄉官馬如蛟募死士登
陴固守城將陷弘業繫印於肘跪告其母曰兒不肖貪
微官以累母奈何母李泣諭曰汝勿以我為意事至此
有死而已遂自縊妻楊妾李及女四人繼之弘業北面
慟哭再拜自刎未殊濡頸血大書曰為臣盡忠為子盡
孝何惜一死賊入傷數刃而死贈太僕少卿任一子判
官錢大用偕妻妾子婦俱死吏目景一高被創死學正

康正諫祁門人舉人偕妻汪子婦章赴水死贈國子監
丞訓導趙世選不屈死贈國子學錄馬如蛟字騰仲州
人天啟二年進士授浙江山陰知縣有清操崇正元年
徵授御史劾罷魏忠賢黨徐紹吉張訥出按四川蜀中
奸民悉以他人田產投勢家如蛟列上十事永革其弊
還朝監武會試武舉董姓者以技勇聞於帝及入試文
不中程被黜帝怒黜考官如蛟亦落職八年論平邦彥
功復故官以父憂未赴流賊至如蛟傾貲募士佐弘業

固守麾壯士出擊兩戰皆捷賊將奔會風雪大作不辨
人色守者皆潰賊遂入城如蛟急下令能擊賊者予百
金須臾得百餘人巷戰賊多傷力屈遂戰死兄鹽運司
判官如虯諸生如虹及家屬十四人皆死事聞贈太僕
少卿官一子

張紹登字振夫南城人崇禎中舉人知應城縣九年賊
來犯偕訓導張國勛鄉官饒可久悉力禦之國勛曰賊
不一創城不易守率壯士出擊力戰一日夜斬獲甚衆

賊去邑侍郎王瑊之子權結怨於族黨怨家漸導賊復來攻國勛佐紹登力守而乞援於上官副將鄧祖禹來救守西南國勛守東北紹登往來策應會賊射書索權權懼斬北關以出賊乘間登南城紹登還署端坐堂上賊至奮拳擊之羣賊大至乃被殺賊渠歎其忠以冠帶覆屍埋堂側國勛黃陂歲貢生賊既入朝服北面拜走捧先聖神主拱立以待賊遂焚文廟投國勛於烈燄中祖禹亦不屈死可久幼孤事母孝舉於鄉知大興縣崇

禎初疏請更三朝要典時庵官擅權謫光祿典簿遷應天府推官刑部主事歷知府丁艱歸賊入語妻程曰臣死忠婦思節分也於是妻女相對自經可久被執賊強之拜曰頭可斷膝不可屈也遂遇害域為賊支解事聞贈紹登尚寶少卿國勛國子學正

王燾字濬仲崑山人少孤貧九歲為人後族人有謀其產者燾舉以讓之迎養嗣祖母及母惟謹萬歷末舉於鄉由教諭歷隨州知州州經羣盜焚掠戶不滿千燾訓

民兵繕守具土寇李良喬為亂殲滅之十年正月大賊
奄至燾且守且戰擊斬三百餘人賊攻益力相持二十
餘日天大風雪守者多散燾知必敗入署整冠帶自經
賊焚其署火獨不及燾死所屍直立不仆賊望見駭走
已覓州印得之燾所立尺土下事聞贈太常少卿福王
時賜謚烈愍建雙忠寺與同邑蔡懋德並祀有魏時光
者南昌人善舞雙刀崇禎九年夏為廣濟典史邑遭殘
破長吏設排兵三百人委之教練其冬賊據蘄州河口

憚時光不敢渡時光益募死士夜襲其營手殺數賊賊不敢逼俄賊大至部卒皆散時光單騎據高坡又殺數人賊環繞之剗斷被執不屈死其兄陳於上官却不奏兄憤發病死友人收斂之哭盡哀曰弟為國死兄為弟死吾獨不能表暴之乎具牘力陳乃奏聞贈廣濟主簿予卹典

蔣佳徵灌陽人天啟四年舉於鄉崇禎中知盱眙縣有聲縣故無城佳徵知賊必至訓民為兵十年秋賊果來

犯設伏要害親率兵往誘賊殲甚衆賊怒環攻之力戰
死母聞之亦投環死兵部議贈奉訓大夫尚寶少卿未
幾巡按御史言佳徵子忠母義宜賜謚廕以植倫常乃
建表忠祠並母奉祀同時江北死難者有吳暢春崇禎
八年為潛山天堂寨巡檢練鄉兵防賊明年冬賊至夜
設燎大驚去之踰年賊再至暢春死守力屈仰天歎曰
吾得死所矣手刃數賊被執不屈死贈迪功郎安慶府
經歷廕子所鎮撫又有王寅錢塘人膂力絕人舉武鄉

試以父征播功為千戶宗禎中擢撫標守備見步卒脆弱說曰曩戚將軍練浙兵聞天下今若爾耶督教之卒始可用十年遷龍州都司調赴泗洲護祖陵賊來犯寅曰賊衆我寡及其未集可破也捲甲疾趨至盱眙斬其先鋒一人戰自午迄申賊來益衆與守備陳正亨陷陣死贈鎮國將軍都指揮僉事正亨贈昭勇將軍指揮使並官一子

徐尚卿南平人舉於鄉知劍州宗禎十年十月李自成

惠登相等以數十萬衆入四川大將侯良柱敗歿於廣
元遂攻陷昭化知縣王時化死之尚卿知賊必至集士
民泣曰城必不能守若輩速去吾死此衆泣請偕去尚
卿不可越二日城陷投繯死吏目李英俊從之賊遂長
驅陷江油彰明安縣羅江德陽漢州吏目皆先遁尋掠
郫縣主簿張應奇死之陷金堂典史潘孟科死之是月
也賊陷州縣三十六以死事聞者四人事定贈尚卿右
叅議時化光祿丞應奇按察司知事孟科將仕郎並賜

卹典時化湖廣人舉鄉試第一

阮之鈿字實甫桐城諸生崇禎中下詔保舉人才同郡
諭德劉若宰以之鈿應授穀城知縣十一年正月之鈿
未至張獻忠襲陷其城據以求撫總理熊文燦許之處
其衆數萬於四郊居民沟沟欲竄之鈿至盡心調劑民
稍安乃上疏言獻忠虎踞邑城其謀叵測所要求之地
實兵餉取道咽喉秦蜀交會脈絡今皆為所據奸民甘
心效用善良悉為迫脅臣守土牧民之官至無土可守

無民可牧庫藏殫虛民產被奪無賦可徵名雖縣令實
贅員爾乃廟堂之上專主撫議臣愚妄謂撫剿二策可
合言未可分言致損國威而挫士氣時不能用賊衆漸
出野外行劫之鈿執之以告其營將稍寘之法及再告
皆不應曰官司不給餉耳得餉自止由是村民徙亡殆
盡遂掠及闌闌稍拒輒挺刃相向日有死者一城大囂
監軍僉事張大經奉文燦令來鎮撫亦不能禁明年獻
忠反形漸露之鈿往說之曰將軍始所為甚悖今幸得

為王臣當從軍立功垂名竹帛且不見劉將軍國能乎
天子手詔進官厚賚金帛此赤誠效也將軍若疑天朝
有異論之鈿請以百口保何嫌何疑而復懷他志獻忠
素銜之鈿遂惡言極罵之之鈿憂憤成病題數語於壁
自誓以死遂不視事至五月獻忠果反劫庫縱囚毀其
城之鈿仰藥未絕獻忠遣使索印堅不予賊遂殺之旋
縱火焚公署骸骨為燼而大經為賊劫去不能死迨瑤
山戰敗偕賊將曹威等出降士論醜之之鈿後贈尚

竇少卿

郝景春字和滿江都人舉於鄉署鹽城教諭坐事罷之
起陝西苑馬寺萬安監錄事量移黃州照磨攝黃安縣
事甫三日羣賊奄至堅守八日夜始解去宗禎十一年
擢知房縣羅汝才率九營之衆請降於熊文燦文燦受
之汝才猶豫景春單騎入其營偕汝才及其黨白貴黑
雲祥歃血盟汝才詣軍門降分諸營於竹谿保康上津
而自與貴雲祥居房縣之野當是時鄖陽諸屬邑城郭

為墟獨房賴景春拊循粗可守及大衆雜處居民日惴

惴景春乃與主簿朱邦聞守脩楊道選修守具輯諸營

明年五月張獻忠反穀城約汝才同反景春子鳴鑾諸

生也力敵萬夫謂父曰吾城當賊衝而羸卒止二百城

何以守乃擐甲詣汝才曰若不念香火盟乎慎毋從亂

汝才佯諾鳴鑾覺其偽歸與道選授兵登陴而獻忠所

遣前鋒已至擊斬其將上天龍遣使縋城乞援於文燦

凡十四往不報已而賊大至獻忠兵張白幟汝才兵張

赤幟俄二幟相雜環城力攻貴雲祥策馬呼曰以城讓
我保無他也獻忠又以張大經檄諭降景春大罵碎之
鳴鑼且守且戰閱五日賊多死乃負板穴城城將崩鳴
鑼熱油灌之又擊傷獻忠左足殺其所愛善馬乃用間
入賊壘陰識獻忠所卧帳將襲禽之指揮張三錫啟北
門揖汝才入道選巷戰死大經使汝才說景春降怒不
答問庫藏儲畜安在叱曰庫藏若有物城豈為汝陷賊
怨殺一典史一守備恐之卒不屈與鳴鑼俱被殺僕陳

宜亦死之邦聞及其家人竝不屈死事聞贈景春尚寶少卿建祠奉祀道選等亦贈卹已帝召見輔臣賀逢聖脩述其死事狀改贈太僕少卿三錫後為官軍所獲磔死

張克儉字禹型屯留人崇禎四年進士授輝縣知縣六年春賊犯武安守脩曹鳴鶚戰死遂犯輝縣克儉棄城固守賊不能下屯百泉書院三日而去遷兵部主事被薦召對稱旨十二年擢湖廣僉事監鄖陽諸軍楊嗣昌

鎮襄陽深倚仗之張獻忠羅汝才之敗也小秦王混世
王過天星等皆降嗣昌處之房竹山中命克儉安輯而
諸賊得免死牌莫肯散自擇便地連營數百里時河南
北大饑流民就食襄漢者日數萬降卒多闖入流民中
克儉深憂之上書嗣昌曰襄陽自古要區本朝筦鑰獻
陵眎昔尤重近兩河飢民雲集新舊降丁遍處其間一
夫叫呼即足致亂況秦兵以長武之變西歸鄖房軍府
粗立降營棊置奚啻放虎自衛紫漢西興初無重門之

脩何恃不恐嗣昌不以為意報曰昔高仁厚六日降賊
百萬迄禽阡能監軍何怯耶及嗣昌入蜀委克儉以留
務錄破賊功加右叅議監軍如故未幾以本官移守下
川南道鄖陽巡撫袁繼咸奏留之十四年二月擢右僉
都御史巡撫河南未聞命獻忠令人假督府軍符誣入
襄陽城克儉不能辨夜分賊從中起焚襄王府克儉倉
皇奔救為賊所執大罵死推官鄭曰廣攝縣事李大覺
游擊黎民安死焉曰廣番禺人崇禎十年進士居官有

守奉檄覈軍儲於荊州甫還任而難作中刃死妻子女
俱遇害大覺字覺之金谿人由鄉舉知穀城兼署襄陽
縣聞變繫印於肘縊死堂上民安大覺同縣人城中火
起率所部千餘人搏戰矢盡被縛抗罵死獨知府夏邑
王承曾遁免初獻忠敗於瑯琊山其妻教氏高氏被獲
他將搜山又獲其軍師潘獨鰲皆繫襄陽獄承曾年少
輕佻每夕托問賊中情形與獻忠二妻笑語獄吏又多
納賄金禁防盡弛獨鰲等脫桎梏恣飲嗣昌移牒戒之承

曾笑曰是豈能飛至耶及是獨鰲果從獄中起承曾率衆奪門走事聞命逮治時河南亦大亂久逮不至未知所終徐世淳字中明秀水人父必達字德夫萬厯二十年進士知溧水縣築石曰湖隄奏除齊泰姒戚子孫軍籍二十六家累遷吏部考功郎中與吏科給事中儲純臣同領察事純臣受賊吏賂當大計日必達進狀請黜純臣面揖之退一座大驚遷光祿丞陳白糧利弊十一事悉允行進少卿巡漕御史孫居相以船壞不治請僱民船

濟運必達爭止之天啟初以石僉都御史督操江軍白
蓮賊將窺徐州必達募銳卒會山東兵擊破之遷兵部
右侍郎以拾遺罷歸卒世淳崇禎中舉人十三年冬歷
隨州知州州嘗被賊居民蕭然世淳知賊必復至集士
民誓以死守會歲大荒士多就食粥廠嘆曰可使士以
餒失禮乎分粟賑之潰兵過隨索餉世淳授兵登陴而
單騎入見軍師曰軍食不供有司罪也殺我足矣請械
我以見督師帥氣奪歛衆去明年三月張獻忠自襄陽

來犯世淳寢食南城譙樓曉夜固守告急於巡撫宋一鶴一鶴遣兵來援為監司守承天者邀去守月餘援絕力窮賊急攻南城而潛兵墮北城以入世淳命子肇梁薤印解後勒馬巷戰矢貫頤耳鼻橫斷墜馬亂刃斫死肇梁奔赴且哭且罵賊將殺之呼州人告以薤印處乃死世淳妾趙王及臧獲十八人皆死後贈太僕少卿建祠以肇梁祔隨自十年正月陷及是再陷至七月復陷判官余塙死焉三陷之後城中幾無孑遺

明史卷二百九十二

欽定四庫全書

明史卷二百九十二考證

張允登傳督餉至甘泉降卒潛與流賊通殺知縣郭永
固劫餉允登力禦不敵死

臣方煒按是時流賊上

天猴劫宜川令馬自然以求撫楊鶴受之處其部二
千人于廊州降卒白柳溪遂勾賊為亂混天猴向隸
允登甘泉之變亦與焉見綏寇紀略謹附識

張光奎傳崇禎五年流賊躡山西

臣方煒按是時賊

以七月破大寧八月破濕州再破石樓壽陽見明紀
事本末謹附識

方國儒傳保康小邑素無兵七年正月賊至國儒急率
鄉兵出禦力不支城遂陷

臣方煒按是時山西河

北諸賊以六年十一月渡河十二月破鄖西上津明
年正月遂由房縣破保康見綏寇紀略謹附識

龐瑜傳賊至猝令跪瑜罵曰賊奴敢辱官長拔刀脅之
罵益厲賊掠城中無所有執至野外剖心裂屍而去

臣方煒按是年閏八月賊圍靜寧州旋破隆德縣固原道陸夢龍來援兵敗死之賊衆五十餘萬於是崇信與靈白水涇州後先皆陷見綏寇紀畧謹附識

龐瑜傳

婁琇附

婁琇知涇州閏八月城陷死

臣方煒

按一統志婁琇湘陰人天啟舉人崇禎中舉人州傳未晰謹附識

尹夢鼇傳崇禎中知潁州八年正月方謁上官於鳳陽

聞流賊大至立馳還賊已抵城下

臣方煒按是時

汝寧賊以正月七日攻潁州其支賊以初八日由固始夜薄霍邱三日而霍邱潰遂焚壽州之正陽鎮十一日破潁州屠之見明紀事本末謹附識

尹夢鼈傳

張鶴鳴附

鄉官尚書張鶴鳴弟副使鶴騰子

大同中書舍人田之潁知縣劉道遠先祿署正李生白訓導丁嘉遇舉人郭三杰諸生韓先祖等皆死之

臣方煒按鶴鳴被害時年八十五賊倒懸射之鶴

鳴嚙齒大罵有賊刺刃者三曰若復能坐而鞭吾背
耶人始知其撫黔時有宿憾見明紀事本末謹附識
盧謙傳賊陷霍邱

臣

方煒按霍邱之陷在鳳陽未陷

之先迨鳳陽破自成偕高迎祥西趨歸德復入陝西
獻忠獨東圍廬州知州吳大櫟固守不克攻巢縣破
之攻舒城知縣章可試開西關墮其溝誘賊入殺千
人賊遂退抵廬江陷之巢縣太湖皆被屠見綏寇紀
略謹附識

史記言傳老獬獬憤率數萬人攻城不克乘雪夜來襲而所練士方調他郡城遂陷

臣方煒按是月朔秦

賊李自成等悉衆薄閬鄉左良玉禦之靈寶東祖寬禦之靈寶西不能支越四日陝州遂陷見明紀事本末謹附識

黎弘業傳崇禎八年流賊犯和州

臣方煒按是時高

迎祥李自成功廬州知府吳大樸合肥令熊文舉堅守不克自成遂進陷含山犯和州見明紀事本末謹

附識

黎弘業傳守者皆潰賊遂入城

臣

方煒按是時操江

臨淮侯李弘濟遣其將薛有年援和以遲發賊已破和而北有年中道失勢遂敗見綏寇紀略謹附識

張紹登傳知應城縣九年賊來犯

臣

方煒按是年十

一月張獻忠老獍狃等賊二十餘萬從均州新野等處分道入襄陽總兵秦翼明不能禦賊由漢江之羅灘上填土渡江遂以十二月破應城於是雲夢孝感

黃陂皆陷全楚震動見明紀事本末謹附識

王燾傳天大風雪守者多散燾知必敗入署整冠帶自

經臣方煒按是時副總兵楊世恩之兵敗于棗陽

隨州既陷遂責世恩戴罪自贖見綏寇紀略謹附識

蔣佳徵傳設伏要害親率兵往誘賊殲甚衆賊怒環攻

之力戰死臣方煒按是年七月皖城襲破六合圍

長天逼揚州揚大賈捐私財構安丁及新舊官軍為

四營賊分掠瓜儀至僧道橋去揚僅一舍知有備乃

北由全澗破盱眙見綏寇紀略謹附識

徐尚卿傳崇禎十年十月李自成惠登相等以數十萬
衆入四川

臣方煒按是時自成等以十月三日破

寧羌州分其軍為三一攻七盤一入廣元一向白水
侯良柱既敗沒賊遂入關於廣元烏龍山下結十七
營分兵守二郎關乃從殘灘過河破昭化見明紀事
本末謹附識

阮之鈿傳十一年正月之鈿未至張獻忠襲陷其城據

以求撫總理熊文燾許之處其衆數萬於四郊居民

沟沟欲竄

臣

方煒按獻忠就撫後文燾命簡精卒

二萬給餉餘散遣之獻忠請十萬人餉文燾為請銜
予賞給以六月餉獻忠具軍狀備調遣既命推官程
九萬調其兵檄之者三不應見綏寇紀略謹附識

阮之鈿傳賊衆漸出野外行劫

臣

方煒按穀城有河

為漢沔所匯獻忠立闕梁月徵其稅陳洪範軍士獲
義武營闕防於草中請即以給獻忠兵科給事中張

縉彥持不可於是獻忠益驕見明紀事本末謹附識

阮之鈿傳至五月獻忠果反

臣方煒按是時陳洪範

所遣將馬廷寶徐起祚助防穀縣城者獻忠皆挾之
去見綏寇紀略謹附識

郝景春傳羅汝才率九營之衆請降於熊文燦

臣方

煒按所謂九營者汝才與一丈青小秦王一條龍為
鄖縣四營惠登相與王國寧常國安楊友賢王光恩
為均州五營見明紀事本末謹附識

郝景春傳分諸營於竹谿保康上津而自與貴雲祥居

房縣之野

臣方煒按汝才之降也文燦檄之從軍

汝才言不願為官無所事餉請受山田以耕卽撫戴

東旻疏曰羅汝才詭占屯部帶刀以耘獻忠飽食休

甲據邑弄兵請敕理

臣

率鄆郢之卒督

臣

掃關隴之

兵乘其不意一舉勦除不報見綏寇紀略謹附識

張克儉傳賊犯武安守備曹鳴鶚戰死遂犯輝縣

臣

方煒按是年二月左良玉挫於武安賊以三四萬從

趙寨而東都司蔡如薰禦之急呼河鳴鶚與中軍馬
擢策應至邵原關遇賊鳴鶚勝之翼日復力戰賊益
多火藥盡擢觀望不前俱死之見紀事本末謹附識
張克儉傳張獻忠羅汝才之敗也小秦王混世王過天
星等皆降 臣方燁按小秦王混世王之降在十三
年七月至九月賊魁過天星及整十萬王光恩相繼
降見綏寇紀略謹附識

張克儉傳獻忠令人假督府軍符誑入襄陽城

臣方

煒按是年正月獻忠敗官軍於開縣席卷出川西桀驁置楚蜀消息中斷賊長驅至當陽縣繼咸方謀出軍獻忠令汝才與相持而自以輕騎一日馳三百里道殺督師使者取軍符以二十八騎持符襲入見明紀事本末謹附識

張克儉傳初獻忠敗於瑪瑙山其妻教氏高氏被獲他將搜山又獲其軍師潘獨鰲皆繫襄陽獄

臣方煒

按潘獨鰲為秦將鄭嘉陳大坪溪搜山所得見綏寇

紀略所謂他將者指此謹附識

徐世淳傳陳白糧利弊十一事悉允行

臣方燁按必

達所陳十一事食貨志諸書均無考謹識

附明史卷二百九十二考證後

乾隆四十一年

賜謚諸臣

史記言 王 信 郝景春

以上通謚忠烈

尹夢鼈 黎弘業 馬如蛟 阮之鈿 張克儉

以上通謚忠節

張允登 吳開先 李呈章 徐明揚 李中正

方國儒 劉定國 高日臨 王永年 郭震辰

田 實 龐 瑜 吉永祚 婁 琇 蒲來舉

張鶴騰 朱國相 袁瑞徵 呂承廕 郭希聖

張鵬翼 周時望 李 郁 岳光祚 陳永齡

盧 謙 嚴 覺 金應元 龔元祥 李君賜

楊道泰 阮我疆 白 楹 梁志仁 楊呈秀

張紹登 王 域 魏時光 蔣佳徵 吳暢春

王 寅 陳正亨 楊道選 曹鳴鶚 鄺曰廣

黎民安 徐世淳

以上通諡烈愍

郭永固 郭景嵩 張光奎 張光璽 楊于楷

程友程 樂濟衆 何承光 董三謨 呂鳴世

趙士寬 田之韻 劉道遠 李生白 李從師

王廷俊 戴廷對 李邁林 王國訓 薄匡宇

趙躋昌 胡爾純 萬代芳 饒可久 王 燾

徐尚卿 王時化 李大覺 余 塙

欽定四庫全書

詞

卷二百九十二

以上通謚節愍





總校官編修臣吳紹濬

欽定四庫全書薈要

史部

明史卷二百九十三

四

詳校官兵部主事臣雷純



欽定四庫全書薈要卷六千八百八十六

史部

明史卷二百九十三

大學士張廷玉等奉 敕修

列傳第一百八十一

忠義五

武大烈

徐日泰等

錢祚徵

盛以恒

高孝誌等

顏日愉

艾毓初等

潘弘

劉振世等

陳豫抱

許宣等



劉振之

杜邦舉
費曾謀等

李采雲

余
萬等

關永傑

侯君擢等

張維世

姚若時等

王世琇

顏則孔等

許永禧

高斗垣等

李貞佐

周卜厯等

魯世任

張
信等

劉裡

陳顯元等

何變

在相申等

趙興基

鄭元綬等

武大烈臨潼人舉天啟七年鄉試崇禎中授永寧知縣
奸人倚萬安郡王恣不法大烈痛懲之十三年十二月

李自成自南陽陷宜陽知縣唐啟泰被害遂攻永寧大烈
與鄉官四川巡撫張論協力捍禦論歿子吏部郎中鼎
延及從父治中讚繼之有獄囚勾賊入都司馬有義棄
城走大烈鼎延等固守三日賊夜半登城執大烈自成
以同鄉欲活之大烈不屈索印又不予乃燔灼以死鼎
延匿皆井免讚及子國學生祚延死之主簿魏國輔教
諭任維清守備王正己百戶孫世英並不屈死萬安王
采鏗亦被害賊移攻偃師一日而陷知縣徐日泰大罵

不屈為賊鬻割死啓泰掖縣人曰秦金谿人並起家鄉
舉明年正月賊陷寶豐知縣朱由械死之陷密縣知縣
朱敏汀及里居太僕卿魏持衡舉人馬體健死之由械
益府鎮國將軍常澈子敏汀亦宗室並由貢生敏汀妾
張一女一孫及臧獲數人俱死與由械並贈僉事是月
陷洛陽鄉官來秉衡劉芳奕常克念郭顯星韓金聲王
明楊萃荀良翰等抗節死秉衡天啓四年舉於鄉未仕
城陷為賊將劉宗敏所執令易服欲官之不可羈南郊

民舍顧見其友謂之曰賊勒我以官我義不受辱恨母
老子幼死不瞑目爾賊聞燒鐵索加其脛終不從遂被
殺并其母劉妾吳及幼子俱殺之芳奕慷慨負智畧與
秉衡同舉於鄉為昌樂知縣解官歸歲大歉人相食傾
橐濟之賊漸逼集義士為干城社佐有司保障及城陷
縊死西城戍樓克念舉進士為平陽推官有聲顯星舉
於鄉為翰林待詔金聲明皆進士金聲官邯鄲知縣明
官行人革良翰皆舉人革官辰州知府良翰未仕

錢祚徵字錫吉掖縣人崇禎中由鄉舉歷官汝州知州
汝為流賊往來孔道土寇又竊據山中祚徵欲先除土
寇募壯士千人訓練而遣人為好言招撫夜半取間道
直搗其巢寇大敗乃令民千家立一大寨有急鳴鉦相
救寇勢衰息其魁遂降十四年正月李自成驟來犯祚
遂陷罵賊而死汝人立廟祀之

盛以恒潼關衛人崇禎十三年舉人知商城縣視事月
餘流賊突至却之明年張獻忠陷襄陽鄰境大恐以恒

已遷開封同知將行士民懇留之乃登陴與鄉官楊
所修洪允衡馬剛中段增輝共城守二月中賊奄至
適雨雪守者凍餒不能戰以恒督家衆射賊十七人
墜馬賊怒併力攻矢中以恒右額猶裹創拒敵賊登
北城家衆巷戰死且盡乃被執罵賊不屈為賊支解
孫覺及典史呂維顯教諭曹維正皆死所修故魏忠
賢黨也歷左副都御史入逆案贖徒為民至是罵賊
死允衡萬歷中進士歷官陽和兵備副使分守北門

力戰死剛中字九如崇禎七年進士除大同知縣行取授檢討乞假歸賊入大罵被磔死增輝字含素為諸生以學行稱朝廷下保舉令被薦不樂為吏擬除教授未謁選歸遇變罵賊死賊既陷南城即疾驅犯信陽城陷知州高孝誌訓導李逢旭程所聞里居靜海知縣張映宿死之其陷光山典史魏光遠亦死之所司請贈卹未報十五年七月帝下詔曰比州縣有司不設守備賊至即陷與衝鋒陷陣持

久力誦者殊科若概援天啓間例優予贈廕何由旌勸
勞臣自今五品以下止贈監司四品及方面始贈京卿
著為令乃贈以恒副使孝誌叅議維顯等贈卹有差天
啟中州縣長吏殉難者率贈京卿廕錦衣世職賜祭葬
有司建祠崇楨初改廕國子生俾之出仕而京卿之贈
如故至是始改贈外僚云

顏日愉字華陽上虞人萬厯中舉於鄉崇禎初除知萊
縣有惠政為上官所惡劾罷部民爭詣闕訟冤乃獲叙

用後為靜寧知州。儼賊亂，馳請固鎮五道兵合勦。而先率敢死士數人招諭之。賊弛備，遂遣精卒擣其營。賊倉皇潰，斬數百級。黎明，五道兵繼至，復大破之，遷開封同知。流賊勢方熾，上官以南陽要衝，舉日愉為知府。大治守具，人心稍固。十四年五月，賊猝至，百餘人冒雨登城。日愉擊殺之，幾盡。餘賊引去，城獲全。日愉手中一矢，頭項被二刀死。城上事聞，贈太僕卿。賊既不得志去，遂縱掠旁近州縣。其冬再圍南陽，攻陷之。參議艾毓初死焉。

毓初字孩如米脂人戶部侍郎希淳曾孫也崇禎四年進士授內鄉知縣生長邊陲習戰事六年冬流寇來犯墾大礮名滾地龍者於城外城中燃線發之賊死無算遂解去內鄉與鄰邑浙川多深山邃谷為盜窟民居慄慄毓初至為設守備民得少安明年冬唐王聿鍵上言祖制親王所封地有司早晚必謁見今艾毓初等皆不謁帝怒悉逮下法司而敕禮部申典制已而王被逮毓初獲補官屢遷至右參議分守南陽與日愉却賊有功

自成用宋獻策計欲取南陽以圖關中復率大眾來寇
毓初偕總兵官猛如虎等堅守賊攻入南門會總督楊
文岳援軍至賊引退文岳去賊復攻之食盡援絕毓初
題詩城樓遂自縊南陽知縣姚運熙主簿門迎恩訓導
楊氣開亦死之明年十月自成再陷南陽知府邱懋素
罵賊不屈闔門被害是月賊過扶溝衆議城守舉人劉
恩澤初嘗以策干當事多見用縣令駭不解事恩澤痛
哭曰吾不幸從木偶人死自題樓壁曰千古綱常事男

兇肯讓人明日城陷擲樓下以死

潘弘字若稚淮安山陽人起家貢生崇禎十三年為舞陽知縣時流賊披猖土寇亦間發弘數討敗之明年十一月李自成羅汝才既陷南陽縱兵覆所屬州縣將攻舞陽弘諭士民共拒諸生慮賊屠城請委曲紓禍弘叱之去賊薄城發礮擊之多斃有小校善射屢却賊諸生潛遣人約降賊復至弘作告先聖文自誓必死諸生潛開門縛弘以獻賊索印弘不于脅降怒罵不屈乃支解

之子澄瀾痛憤大哭投井死時鄧州鎮平內鄉泌陽新

野相繼陷鄧州知州劉振世吏目李國璽千戶余承鏐

李錫諸生丁一統張五美王鍾王子章海寬傅彥皆抗

節死鎮平知縣成縣鍾其碩被執罵賊死內鄉知縣南

昌翼新新野知縣四川韓醇並不屈死泌陽凡再陷是

年五月張獻忠破信陽獲左良玉旗幟假之以登城知

縣雲南南寧王士昌懷印端坐被縛謾罵死臨昌姚昌

祚代之甫數月復陷昌祚手斬數賊力屈死典史雷晉

遲率捕卒戰死又有武職王衍范錢繼功海成俱死難而鄧州於十年春為張獻忠所破知州孫澤盛同知薛應齡皆戰死至是亦再陷云

陳豫抱武陽人母段早寡撫豫抱及其弟豫養豫懷皆為諸生力田好學善承母志崇禎十四年流賊陷舞陽母先赴井三子從之豫抱妻黃攜其子默通豫養妻馬攜子默恒默言俱從之三世九人一時盡節時郡邑諸生死者甚衆錄其著者內鄉許宣及二弟來官慷慨好

義賊陷鄧州宣兄弟結里中壯士直入其城禽偽官堅

守許家寨賊怒攻破之宋從母常先投井死宣宮皆嘗

賊被殺宮妻鍾宋妻陳並自經其妹亦罵賊被殺時稱

許氏七烈賊之攻偃師也張毓粹率二子佐有司固守

城陷大罵俱被殺妻蘭與三女二孫悉赴井死賊殺武

同芳母同芳噴血大罵支解而死劉芳名劉芳世蘭之

粹裔于昆蘭完顏王光顯裔國屏王邦紀蘭相裔張一

鷺張一鵬牛一元皆抗節死芳名完顏妻皆張氏與邦

紀妻高並從死一鷺一鵬父亦罵賊死唐縣許曰琮早
喪父母歿盧墓三年城破遁居南山賊徵之不出脅以
死鵬其背曰誓不從賊遂嘔血而死

劉振之字而強慈谿人性剛方敦學行鄉人嚴重之崇
禎初舉於鄉以教諭遷鄆陵知縣十四年十二月李自
成陷許州知州王應翼被害都司張守正鄉官魏完真
諸生李文鵬王應鵬皆死自許以南無堅城有奸人素
通賊倡言城小宜速降振之怒叱退之典史杜邦舉曰

城存與存亡與亡人臣大義公言是振之乃與集吏民共守賊大至陷城振之秉笏坐堂上賊索印不與縛置雪中三日夜罵不絕口亂刃交下乃死初振之書一小簡藏篋中每歲元旦取視輒加紙封其上及死家人發篋乃不貪財不好色不畏死三語也其立志如此贈光祿寺丞邦舉富平人許被屠鄆陵人恟懼守者或遁走邦舉捕得斬以徇及城陷自成欲降之邦舉罵曰朝廷臣子豈為賊用賊挾其舌含血噴之遂被害開封屬邑

多陷殉難者有費曾謀魏令望柴薦禋楊一鵬劉孔暉

王化行姚文衡之屬曾謀鉛山人少師宏裔也由鄉舉

知通許甫四旬賊猝至曾謀召父老曰我死若輩以城降

可免屠戮北向再拜抱印投井死令望字于野武鄉人

舉進士授商邱知縣調太康寇至固守不下賊怒攻破

之屠其城令望闔門自焚薦禋江山舉人知涓川城陷

大罵死一鵬河津人舉崇禎九年鄉試為尉氏知縣甫

數月政聲四起城破罵賊死孔暉邵陽人舉天啟元

年鄉試知新鄭固守不能支遂死之士民祀之子產祠
化行知商水城陷被殺代者文衡莅任數月賊復至攜
印赴井死其小吏則臨潁千總賈廕序長葛典史杜復
春鄉居則長葛舉人孟良屏諸生張範孔等汜水舉人
張治載馬德茂皆死之

李乘雲高陽人舉於鄉崇禎初知浮山縣流賊數萬來
寇乘雲手發一矢斃其魁衆遂遁屢遷山西僉事十四
年秋以才調河南大梁道駐禹州十二月李自成連陷

鄢陵陳留諸縣遂寇禹州乘雲誓死固守賊多斃於礮
俄以十萬衆攀堞登執乘雲使跪乘雲怒叱賊賊碎而
杖之大罵不絕聲縛諸樹攢射之罵不已斷其舌亂刃
交下而死贈光祿卿州先有徽王府嘉靖時王載掄有
罪爵絕而延津等五郡王皆被難明年賊犯開封監軍
主事余爵監軍僉事任棟先後戰死爵禹州人崇禎元
年進士歷知撫寧章邱遷職方主事罷歸楊嗣昌出督
師請爵以故官參謀軍事嗣昌入蜀命與張克儉同守

襄陽城陷爵脫走從督師丁啟睿於河南破賊鄧州十

五年開封圍急監軍左良玉往援戰敗被執罵賊死姪

敦華亦遇害棟永壽人由貢生為萊州通判崇禎四年

李九成等叛棟佐知府朱萬年共守萬年與巡撫謝璉

為賊所誘執棟與同知寇化掖縣知縣洪恩昭助大帥

楊御蕃力拒圍解論功進秩屢遷保定監軍僉事十四

年從總督楊文岳南征鳴臯鎮之捷與有功尋與總兵

虎大威破賊平峪再破之鄧州明年正月從解開封圍

尋戰郾城大捷後從援開封會左良玉大潰於朱仙鎮
賊來追棟力戰歿於陣爵贈太僕少卿棟贈太僕卿
關永傑字人孟鞏昌衛人世官百戶永傑好讀書每遇
忠義事輒書之壁狀貌奇偉類世人所繪關忠義像崇
禎四年會試入都與儕輩遊忠義祠有道士前曰昨夢
神告吾後人當有登第者後且繼我忠義可語之永傑
愕然頗自喜己果登第授開封推官強植不阿民畏愛
之憂歸起官紹興遷兵部主事督師楊嗣昌薦其才請

用之軍前乃擢睢陳兵備僉事駐陳州陳故賊衝歲被蹂躪永傑日夜為儆備十五年二月李自成數十萬衆來攻永傑與知州侯君擢鄉官崔泌之舉人王受爵等率士民分堞守賊遣使說降斬其頭懸之城上賊怒攻破之永傑格殺數賊身中亂刃而死君擢字際明成安人起家舉人城圍時身先士卒運木石擊賊城濠皆滿後被縛罵不絕口死泌之鹿邑人進士知雄縣調清苑多所建豎舊令黃宗昌為御史劾周延儒延儒屬保定

知府撫宗昌罪知府以屬泌之泌之曰殺人媚人可乎
知府愧且怒會泌之遷戶部主事知府謂其侵隱錢糧
三萬不聽行御史行部至泌之直前與知府角御史以
聞下獄遣戍久之釋還至是遭變用鐵杖斃賊數人自
劉死守備張鷹揚力戰被禽不屈受爵亦擊殺數賊大
罵並死之贈永傑光祿卿君擢右參議泌之復故官受
爵宛平知縣有龔作梅者年十七父母俱亡殯於舍賊
火民居作梅踰柩前焚死

張維世太康人萬曆四十四年進士歷平陽知府捕治絳州奸猾數十人遷副使累官右僉都御史代陳新甲巡撫宣府視事甫旬日坐失防削籍遣戍已而釋還崇禎十五年二月李自成陷睢州犯太康維世佐知縣魏令望竭力拒守城陷抗節死時中州縉紳先後死難者甚衆十三年登封土寇李際遇因歲饑倡亂旬日間衆數萬前鳳陽通判姚若時居魯莊被執誘之降大罵死族諸生丕顯亦死之若時子諸生城思報父讎數請兵

討賊賊執之於路亦抗罵死陝州趙良棟仕蓬萊教諭
罷歸寓澠池寇陷澠池與子德罵賊死子婦陳與孫亦
赴井以殉陝州之陷平定知州梁可棟大罵而死淮安
同知萬大成投井死商水陷臨汾知縣張質抗賊死西
平陷懷仁知縣楊士英死之子婦王亦死睢州陷太平
知府杜時髦不屈死時髦字觀生崇禎七年進士息縣
陷賊召前項城教諭王多福欲官之堅拒不赴賊逼之
投繯死其後以國變死者有洛陽阮泰知廣靈解職歸

聞京師陷不食死妻朱氏從之睢州楊汝經崇禎十年
進士授戶部主事擢井陘兵備僉事十七年甘肅陷巡
撫林日瑞殉難起拜汝經右僉都御史代之行次林縣
聞京師陷將赴南京至東明率壯士百餘騎還討林縣
偽官遇賊戰敗被執偽官釋其縛屢說之降不從斃之
獄

王世琇字崑良清苑人崇禎十年進士授歸德推官遷
工部主事十五年二月李自成陷陳州乘勝犯歸德世

琇將行僚屬邀共守慨然曰久官其地臨難而去之非
誼也遂與同知顏則孔經歷徐一源商邱知縣梁以樟
教諭夏世英里居尚書周士樸等誓衆堅守賊攻圍七
日總督侯恂家商邱其子方夏率家衆斬關出傷守者
衆遂亂賊乘之入世琇則孔並遇害則孔女聞之即自
縊一源分守北城殺賊多城陷巷戰罵賊死以樟中賊
刃久而復甦妻張及子女僕從皆死以樟竟獲免世英
持刀罵賊死於明倫堂妻石亦自刎同死者尚書士樸

工部郎中沈試主事朱國慶中書侯忻廣西知府沈仔
威縣知縣張儒及舉人徐作霖吳伯允周士美等六人
官生沈秘侯駿等三人貢生侯恒沈誠周士貴等八人
國學生侯棕沈倜等四人諸生吳伯喬張渭劉伯愚等
一百十餘人試商邱人大學士鯉之孫作霖伯允伯喬
渭伯愚皆郡中名士則孔忻州人一源海鹽人世英祥
符人士樸自有傳賊既破歸德尋陷鹿邑知縣紀懋勛
死之陷虞城署縣事主簿孔亮死之

許永禧曲沃人由鄉舉為上蔡知縣多惠政性耿介頗
笑無所假崇禎十五年春李自成遣數將抵城下脅降
永禧即督吏民城守賊大呼曰今日不降明日屠衆懼
永禧嘆曰賊勢披猖彈丸邑豈能守吾一死盡職而已
衆皆泣明日賊果大至守者驚潰永禧具袍笏北面再
拜據案秉燭端坐賊入遂自剄死西平遂平先後皆陷
西平知縣高斗垣繁峙人崇禎十二年由貢生授官為
人孤鯁以清慎得名城陷被執不屈死遂平知縣劉英

貴州貢生誓衆死守城陷罵賊死上蔡既陷有官篆者以汝寧通判往攝縣事城中民舍盡燬篆廣招流亡衆觀望不敢入會左良玉駐城南兵士恣淫掠衆始入城依篆村民遭難來愬篆即入良玉營責以大義奪還之悍卒挾弓刀相向篆坦腹當之不敢害民獲完家室者甚衆是年冬汝寧陷賊黨賀一龍掠地上蔡譌傳土寇剽掠篆禦之陷陣死篆膠州人起家任子

李貞佐字無欲安邑人少受業同里曹于汴之門以學

行著後舉於鄉崇禎十四年除知邳縣初李自成焚掠至邳土寇導之害前令邵可灼貞佐至則練鄉兵括土寇財充餉時出郊勞耕者月課士邑有姊妹二人抗賊死拜其冢祀以少牢民王錫允有孝行造廬禮之士民大悅明年二月自成復來寇貞佐集衆死守汝州吏目顧王家仁和人撫賊有功當遷汝人乞留以助之城陷貞佐走拜其母曰兒不忠不孝陷母至此有勸徵服遁者不可賊執之去大罵見賊殺人輒厲聲曰驅百姓固

守者我也妄殺何為賊割其舌支解而死母喬亦死友人王昱相隨不去賊義之昱收葬貞佐於南郊歲寒食鄉人傾邑祭奠廣其冢至二畝餘贈河南僉事王家亦大聲叱賊賊亂刃斫死子國誘賊發金墟墓間用巨石擊殺之賊遂盡殺邾人邾有陳心學者授知縣不謁選而歸其友周卜厯舉鄉試知內黃以父喪歸里自成陷邾執兩人欲官之心學不從被殺自成謂卜厯曰為我執知縣來可代汝死曰戕人以利己仁者不為賊怒并

殺之汝所轄四邑並陷寶豐知縣張人龍遵化人城陷
不屈死妻年少悍奴四人欲亂之妻飲以酒俾極歡潛
遣婢告丞尉捕殺奴乃扶櫬旋里魯山知縣楊呈芳山
海衛人有惠政練總詹思鸞與進士宗麟祥等謀不軌
呈芳捕斬之城陷死伊陽知縣孔貞璞曲阜人賊薄城
以守禦堅解圍去他日有事汝陽道遇賊被執亦不屈
死寶豐之陷也舉人李得筭短衣雜衆中為所執賊謀
主牛金星者故舉人也勸賊重用舉人賊所至獲舉人

即授以官得筭終不自言賊莫知其為舉人也役使之不肯伺賊寐將刺之賊覺被殺或告賊曰此舉人也賊懼棄其屍而去時中州舉人盡節者南陽張鳳翔王明物洛陽張民表永城夏云醇商城余容善光州王者瑄光山胡植嵩縣王翼明竝罵賊死

魯世任字媿尹垣曲人性端方事親孝從安邑曹于汴學又交絳州辛全學日有聞天啟未舉于鄉崇禎十年知鄭州建天中書院集士子講肄其中遠近從學者千

人十三年秋給事中范士髦薦世任及臨城諸生喬已
百內邱太原通判喬中和於朝稱為德行醇儒堪繼薛
瑄陳獻章之後乞召試平臺置左右備顧問不報十五
年流賊來犯世任勒民兵禦之河干戰敗自刎死士民
祀之書院中其年正月賊陷襄城知縣曹思正被殺訓
導張信罵賊不屈死典史趙鳳豸拒賊死復陷西華知
縣劉伯驂懷印投井死明年汜水陷知縣周騰蛟亦死
馬伯驂河間人由歲貢生得官賊信急遣妻奉母歸及

城被困有勸出降者立斬之登陴死守賊驅其下為十
覆迭攻之城遂陷抗節死騰蛟香河舉人邑兵荒撫字
有術以其間釐定徭役民甚便之城孤懸河畔縣人吳
邦清等於城南立七砦相犄角摩天砦最險土寇李際
遇伺騰蛟往河北急據之遂攻縣城騰蛟聞力請於上
官救兵至始解去騰蛟念故城難守遷縣治于摩天砦
以扼賊衝未幾賊大至持十餘日勢且不支砦臨河可
渡以免騰蛟曰吾何忍舍衆獨生遂自投于河賊退人

從河濱獲其屍卽懸肘間河南凡八郡三在河北自六年蹂躪後賊未再犯其南五郡十一州七十三縣靡不殘破有再破三破者城郭邱墟人民百不存一朝廷亦不復設官間有設者不敢至其地遙寄治他所其遺黎僅存者率結山寨自保多者數千人少者數百人大者洛陽則際遇汝寧則沈萬登南陽則劉洪起兄弟各擁衆數萬而諸小寨悉歸之或附賊或受朝命陰陽觀望獨洪起嘗官副總兵頗恭順其後諸人自相吞併中原

禍亂於是為極至十六年四月帝特下詔蠲五郡賦三年諭諸人赦其罪斬偽官者受職捕賊徒者賚金復城獻俘者不次擢用然事已不可為矣

劉禪字誠吾中部人祖仕刑部郎中以諍大禮廷杖後與定李福達獄下吏遣戍穆宗朝起太僕少卿不就父爾完歷知商邱名山有學行禪性孝母歿于名山四千里扶櫬過劍閣雲棧以肩任之父少寐愛聽史記禪每夕朗誦俟父熟寢乃已崇禎四年賊陷中部禪負父走

免十四年由鄉舉授登封知縣土寇為亂裡練壯士且
守且戰寇不敢近十五年李自成陷其域裡被縛自成
以同郡故欲降之裡叱曰豈有與世清白吏肯降賊耶
自成義之遣賊將反覆說裡執彌厲乃見殺贈僉事陳
顯元者由副榜授新安知縣惡衣糲食徒步咨疾苦以
城堞傾頽寇至不能守率士民入保闕門寨賊檄降立
碎其檄及來犯死守月餘力竭而臨見賊怒罵賊大殺
寨中人顯元叱曰守寨者我也百姓何辜寧殺我賊怒

遂支解而死當是時河南被賊尤酷故死事者尤多其
傳錄未詳者開封之陷則同知蘇茂均通判彭士奇大
使徐陞閻生白皆死之士奇高要人由鄉舉河南之陷
則先後知府亢孟檜王蔭長通判白守文訓導張道脈
靈寶知縣朱挺或被執不屈或陷城自盡孟檜臨汾人
蔭長吳橋人竝由鄉舉南陽之陷則葉縣知縣張我翼
被害新野先後知縣陳公邱茂表皆死之汝寧之陷武
臣則遊擊朱崇祖千戶劉懋勲楊紹祖袁永基同子世

蔭百戶葉榮蔭張承德李衍壽閻忠國皆力戰死崇祖
妻孫永基母王亦死之歲貢生林景暘國學生趙得庚
楊道臨等諸生趙重明費明棟楊應禎李士諤等皆死
之巡按御史蘇京奉詔錄上凡二百四十九人後因國
變諸籍散佚蓋武職及州縣末秩舉貢諸生所遺者幾
什之五六

何燮字中理晉江人舉於鄉崇禎中知亳州州自八年
後寇賊交橫益以饑饉民死徙過半燮盡心拊循營戰

守具甚備未幾山東河南土寇迭至變戰盧家廟生禽賊魁二人刳其腸示衆撫降者數千人十五年二月李自成陷河南居民望風逃竄城空不能守賊至執燮欲降之罵不屈斷足剖胸而死懸首市上三日耳鼻猶動賊遂縱兵四出霍邱靈璧盱眙皆陷霍邱八年春嘗陷至是再陷知縣左相申率兵巷戰力屈死之巡檢吳姓者鬪死靈璧知縣唐良銳全州舉人城陷抗罵死盱眙先被陷賊至士民悉走獨主簿胡淵不去縣故無城淵

持戟至龜山寺力鬪殪數人賊駭欲遁會馬蹶被執奮罵而死淵永年人起家貢生

趙興基雲南太和人崇禎初以鄉舉通判廬州賀一龍左金王等五部據英霍二山暑入秋出以為常督師楊嗣昌遣監軍僉事楊卓然招之受侮而返十四年六月襲陷英山知縣高在崙抗賊死十二月陷潛山知縣李孕嘉典史沈所安素苛急奸民導賊執之竝不屈死所安子亦死焉十五年張獻忠為左良玉所敗走與諸部

合遂以三月攻舒城踰月城陷改為得勝州據之遣其
黨分掠旁邑游騎日抵廬州城下興基與知府鄭履祥
經歷鄭元綬合肥知縣潘登貴指揮同知趙之璞里居
參政程楷分門守監司蔡如蘅貪戾民不附賊謀滿城
中不能知五月提學御史徐之垣以試士至獻忠遣其
徒偽為諸生襲儒冠以入夜半舉礮城中大擾之垣如
蘅及履祥登貴並縋城走興基時守水西門聞變挺刃
下戍樓與鬪斬數人被創死元綬楷共守南薰門元綬

力鬪死楫不屈死之璞守東門巷戰死賊乘勢連陷含
山巢縣廬江及無為六安又陷太湖知縣楊春芳典史
陳知訓教諭沈鴻起訓導婁懋履並死焉廬州城池高
深八年春賊百方力攻知府吳太樸堅守不下後屢犯
終不得志至是以計得之履祥登貴懼罪委之興基總
督史可法察其寃以聞乃治守令罪而贈興基河南僉
事指光祿卿元綬亦贈卹方賊攻舒城縣令適以憂去
里居編修胡守恒與遊擊孔廷訓督民兵共守會遊擊

縱所部淫掠士民遂叛降賊城將陷悍卒殺守恒事聞
贈少詹事謚文節

明史卷二百九十三

欽定四庫全書

明史卷二百九十三考證

武大烈傳

徐日泰等附

賊夜半登城執大烈自成以同

鄉欲活之大烈不屈索印又不符乃燔灼以死

臣

方煒按武大烈及唐泰啟張讚王正已徐日泰朱由
臧朱敏汀魏時衡劉芳奕常克念韓金聲王明楊萃

賜諡俱另載卷末謹識

武大烈傳

徐日泰等附

讚及子國學生祚延死之

臣

方煒按張祚延魏國輔任維清孫世英馬體健來秉
衡郭顯星荀良翰俱

賜祀忠義祠謹識

錢祚徵傳礮炸樓焚城遂陷罵賊而死

臣方煒按

錢祚徵

賜謚另載卷末謹識

盛以恒傳張獻忠陷襄陽鄰境大恐

臣方煒按獻忠

陷襄陽居兩日即破樊城返而破當陽郟縣招汝才

兵東下入光州汝寧以南商城及羅山息縣信陽固始
殘破殆盡見明紀事本末謹附識

盛以恒傳

高孝誌等附

乃被執罵賊不屈為賊支解

臣方煒按盛以恒及洪克衡馬剛中高孝誌張映
宿

賜謚俱另載卷末謹識

盛以恒傳

高孝誌等附

增輝字含素為諸生以學行稱

朝廷下保舉令被薦不樂為吏擬除教授未謁選歸

遇變罵賊死

臣

方煒按段增輝盛覺呂維顯曹維

正李逢旭程所聞魏光遠俱

賜祀忠義祠謹識

顏日愉傳

艾毓初等附

上官以南陽要衝舉日愉為知

府

臣

方煒按是時左良玉賜南陽躡賊于西山賊

走獻忠汝才合兵來攻日愉與指揮王汝章禦却之

見綏寇紀畧謹附識

顏日愉傳

艾毓初等附

日愉手中一矢頭項被二刃死

城上

臣

方煒按顏日愉及艾毓初姚運熙邱懋素

賜諡俱另載卷末謹識

顏日愉傳主簿門迎恩訓導楊氣開亦死之

臣方煒

按門迎恩楊氣開劉恩澤俱

賜祀忠義祠謹識

潘弘傳

劉振世等附

賊索印弘不予脅降怒罵不屈乃

支解之

臣

方煒按潘弘及劉振世鍾其顧龔新韓

醇王士昌姚昌祚孫澤盛薛應齡

賜謚俱另載卷末謹識

潘弘傳

劉振世等附

子澄瀾痛憤大哭投井死

臣方

煒按潘澄瀾李國璽余承蔭李錫丁一統張五美王
鍾王子章海寬傳彥雷晉暹王衍范錢繼功海成俱
賜祀忠義祠謹識

陳豫抱傳

許宣等附

賊陷武陽母先赴井三子從之豫

抱妻黃携其子默通豫養妻馬攜子默恒默言俱從
之三世九人一時盡節

臣

方煒按陳豫抱豫養豫

懷陳默通默恒默言許宣及弟案官張毓萃武同芳
劉芳名劉芳世蘭之粹喬于昆蘭完韻王光顯喬國
屏王邦紀蘭相裔張一鷺一鵬及父某牛一元許曰
琮俱

賜祀忠義祠謹識

劉振之傳自許以南無堅城

臣方煒按是時許以南

諸邑如涪川長葛陳留禹州皆與鄢陵先後相繼陷見
綏寇紀畧謹附識

劉振之傳

杜邦舉附

振之秉笏坐堂上賊索印不與縛

置雪中三日夜罵不絕口亂刃交下乃死

臣方緯

按劉振之及王應翼張守正杜邦舉費曾謀魏令望
柴薦裡楊一鵬劉孔暉王化行姚文衡

賜謚俱另載卷末謹識

臣方緯按魏完真李文鵬王應

鵬賈蔭序杜復春孟良屏張範孔張治載馬德茂俱

賜祀忠義祠謹識

劉振之

費曾謀等附

開封屬邑多陷殉難者有費曾謀

魏令望柴薦裡楊一鵬劉孔暉王化行姚文衡之屬

臣方煒按曾謀綏寇紀畧作令謀與此互異謹附

考

李乘雲傳

余爵等附

執乘雲使跪乘雲怒叱賊賊摔而

杖之大罵不絕聲縛諸樹攢射之罵不已斷其舌亂

刃交下而死

臣

方煒按李乘雲及余爵任棟

賜謚俱另載卷末謹識

李乘雲傳

余爵等附

戰敗被執罵賊死姪敦華亦遇害

臣方煒按余敦華

賜祀忠義祠謹識

關永傑傳陳故賊衝歲被蹂躪

臣方煒按是時自成

再圍開封為陳永福等禦却遂移兵攻陳州城破之
日賊怒而屠之少長無或免者睢州太康寧陵考城
商水西華遇賊輒潰見明紀事本末謹附識

關永傑傳

侯君擢等附

永傑格殺數賊身中亂刃而死

臣方煒按關永傑及侯君擢崔泌之張鷹揚

賜謚俱另載卷末謹識

關永傑傳

侯君擢等附

受爵亦擊殺數賊大罵竝死之

臣方煒按王受爵龍龔作梅俱

賜祀忠義祠謹識

張維世傳

姚若時等附

維世佐知縣魏令望竭力拒守

城陷抗節死

臣

方煒按張維世及姚若時梁可棟

萬大成張質楊士英杜時髦阮泰楊汝經

賜謚俱另載卷末謹識

張維世傳

姚若時等附

前鳳陽通判姚若時居魯莊被

執誘之降大罵死族諸生丕顯亦死之

臣方煒按

姚丕顯姚城趙良棟王多福俱

賜祀忠義祠謹識

張維世傳

姚若時等附

若時子諸生城思報父讐數請

兵討賊賊執之于路亦抗罵死

臣方煒按河南通

志若時殉節時從子丕顯及丕烈丕振麟徵等並死

之傳訛丕為不謹據改丕烈丕振麟徵並

賜祀忠義祠謹識

張維世傳

姚若時等附

陝州趙良棟任蓬萊教諭罷

歸寓渾池寇陷渾池與子德易罵賊死子婦與孫亦

赴井以殉

臣

方煒按良棟子名德易見河南通志

傳未晰謹據易德易並

賜祀忠義祠謹識

王世琇傳

顏則孔等附

知縣梁以樟

臣

方煒按以樟

故鄖撫夢澤子也歸德以無藩封不置兵賊至以樟

因偕世琇等集鄉勇為守禦見綏寇紀畧謹附識

王世琇傳

顏則孔等附

世琇則孔竝遇害

臣方煒按

王世琇顏則孔徐一源沈試朱國慶侯忻沈仔張儒
紀懋勛孔亮

賜謚俱勇載卷末謹識

王世琇傳

顏則孔等附

舉人徐作霖吳伯允周士美等

六人官生沈佖侯駿等三人貢生侯恒沈誠周士貴
等八人國學生侯惇沈侗等四人諸生吳伯喬張渭

劉伯愚等一百十餘人

臣方燁按夏世英徐作霖

吳伯允周士美沈佖侯駿侯恒沈誠周士貴侯際沈
倜吳伯喬張渭劉伯愚俱

賜祀忠義祠謹識

許永禧傳

高斗恒等附

永禧具袍笏北面再拜據案秉

燭端坐賊入遂自刎

臣方燁按永禧及高斗垣劉

英官篆

賜謚俱另載卷末謹識

許永禧傳

高斗垣等附

是年冬汝寧陷

臣

方煒按是

年七月孫傳庭兵至南陽為自成汝才所敗復陷南陽屠之閏十一月遂進圍汝寧陷之見綏寇紀畧謹

附識

李貞佐傳

周卜歷等附

明年二月自成復來寇

臣方

煒按是時成分兵為四老猗猗承天羅汝才守襄陽革裏眼往黃州而自將其一以攻郊見明紀事本末謹附識

李貞佐傳

周卜歷等附

賊割其舌支解而死

臣方煒

按貞佐及邵可灼顧王家陳心學周卜歷張人龍楊

呈芳孔貞璞

賜謚俱另載卷末謹識

李貞佐傳

周卜歷等附

王家亦大聲叱賊賊亂刃斫死

子國誘賊發金墟墓間用巨石擊殺之賊遂盡殺邾

人

臣

方煒按顧國李得等張鳳翔王明物張民表

夏云醇余容善王者瑄胡植王翼明俱

賜謚忠義祠謹識

魯世任傳

張信等附

河干戰敗自剄死

臣

方煒按魯

世任及曹思正劉伯驂周騰蛟

賜謚俱另載卷末謹識

魯世任傳

張信等附

訓導張信罵賊不屈死

臣

方煒

按張信趙鳳豸俱

賜祀忠義祠謹識

魯世任傳

張信等附

獨洪起嘗官副總兵頗恭順

方煒按沈萬登亦嘗授副總兵于十四年十月誅偽

將軍馬尚志并諸偽官復汝寧見明紀事本末謹附識

劉裡傳

陳顯元等附

土寇為亂

臣

方煒按是時登封

李遇申靖邦等據山為亂見河南通志所謂土寇者

即此謹附識

劉裡傳

陳顯元等附

遣賊將反覆說裡執彌厲乃見殺

臣

方煒按劉裡及陳顯元蘇茂均彭士奇亢孟檜

王蔭長白守文朱挺張我翼陳公邱茂表朱崇祖

賜謚俱另載卷末謹識

劉禔傳

陳顯元等附

河南被賊尤酷故死事者尤多

臣方煒按徐陞閻生白張道脉劉懋勲楊紹祖袁永

基袁世蔭葉榮蔭張承德李衍壽閻忠國林景暘趙
得庚楊道臨趙重明費明棟楊應禎李士諤俱

賜祀忠義祠謹識

何燮傳

左相申等附

斷足剖胸而死懸首市上三日耳

鼻猶動

臣

方煒按何燮左相申唐良銳胡淵

賜謚俱另載卷末謹識

何變傳

左相申等附

知縣左相申率兵巷戰力屈死之

巡檢吳姓者鬪死

臣方煒按吳某

賜祀忠義祠謹識

趙興基傳

鄭元綬等附

興基時守水西門聞變挺刃下

戍樓與鬪斬數人被創死

臣方煒按趙興基及高

在崙李孕嘉趙之璞程楷楊春芳

賜謚俱另載卷末謹識

趙興基傳

鄭元綬等附

元綬力鬪死

臣

方煒按沈所

安鄭元綬陳知訓沈鴻起婁懋履俱

賜祀忠義祠謹識

趙興基傳之垣如衡及履祥登貴竝縋城走

臣方煒

按流賊傳廬州陷知府鄭履祥死之明紀事本末綬
寇紀畧所載皆同均與此互異但下文稱履祥委失
城之罪於興基史可法因察治履祥罪則履祥爾時
實以遁免而流賊傳所載誤謹附考

趙興基傳

鄭元綬等附

悍卒殺守恒

臣方煒按是時

廷訓降賊教以衝棚穴城城陷賊剗守恒腹以矛數十創而死見綬冠紀畧此云悍卒殺守恒互異謹附

考

附明史卷二百九十三考證後

乾隆四十一年

賜謚諸臣

武大烈 馬剛中 顏日愉 潘宏 劉振之

魏令望 李乘雲 關永傑 李貞佐 陳顯元

以上通謚忠烈

艾毓初 張維世 魯世任

以上通謚忠節

徐日泰 朱由械 朱敏汀 盛以恒 洪允衡

高孝誌 邱懋素 鍾其碩 王士昌 杜邦舉

柴薦裡 劉孔暉 余爵 任棟 侯君擢

崔泌之 姚若時 梁可棟 楊士英 徐一源

許永禧 劉英 顧王家 周卜歷 朱崇祖

何燮 胡淵 趙興基 高在崙 李孕嘉

趙之樸 程楷

以上通謚烈愍

唐啟泰 張讚 王正己 魏持衡 劉芳奕

常克念 韓金聲 王明 楊萃 錢祚徵

張映宿 姚運熙 劉振世 龔新 韓醇

姚昌祚 孫澤盛 薛應齡 王應翼 張守正

費曾謀 楊一鵬 王化行 姚文衡 張鷹揚

萬大成 張質 杜時髦 阮泰 楊汝經

王世琇 顏則孔 沈試 朱國慶 侯忻

沈仔 張儒 紀懋勛 孔亮 高斗垣

官篆 邵可灼 陳心學 張人龍 楊呈芳

孔貞璞 曹思正 劉伯驂 周騰蛟 劉 裡

蘓茂均 彭士奇 亢孟檜 王蔭長 白守文

朱挺 張我翼 陳公 邱茂表 左相申

唐良銳 楊春芳

以上通謚節愍